

6. NA OGNJIŠTU DOMAĆINA

(8. februar 1984)

Otkako je juče u 13 sati hokejaški pak prvi put dotakao ledenu plohu dvorane u Skenderiji, na početku susreta Finska – Austrija, u Sarajevu se mnogo toga munjevito izmijenilo kada je u pitanju poimanje vremena. Kao da je taj prvi dodir bakelita i leda, 25 sati prije oficijelnog otvarenja XIV zimskih olimpijskih igara, poput naglo pridošlog vjetra, otpuhao do tada višegodišnje nataloženo razmišljanje i uvjerenje o tome – o tolikim glomaznim i napornim pripremama – da je sve to samo neka vrsta nedostignutog cilja. Sada je ovim hokejaškim dvobojom, kao prvom početnom tačkom oficijelnog olimpijskog programa, cilj postao stvarnost; sada je do juče maštani cilj sušta stvarnost pred očima i građanima i organizatora.

Gosti, koji teku gradom poput rijeke, naravno, sve to doživljavaju na svoj način. Uzbudeni i uzneseni domaćini za njih su sada prizori i trenuci prijatnosti susreta sa tolikim bujicama uzbudljivosti, entuzijazma i razdraganosti.

Ovo se posebno danas, na dan službenog i svečanog otvaranja Igara, osjeća se po vjeri i ključanju desetina hiljada ljudi, u različitim uniformama i odorama, sa različitim amblenima i zastavama i sa šarenilom različitih jezika. Masa domaćeg i stranog svijeta kretala se, opušteno ali svečarski, prema stadionu „Koševo“, gdje je predviđeno spektakularno zvanično otvaranje XIV zimskih olimpijskih igara Sarajevo '84.

Ovim sarajevskim svečanim mimohodom kao da je samo nastavljeno sinoćnje slavljeničko odavanje počasti Olimpijskom plamenu na platou pred Skenderijom. Ugledni umjetnici, pjevači, sportisti, pjesnici, glumci, muzičari i drugi u najvećem entuzijazmu i nadahnuću utrkivali su se ko će više utkati vlastitih emocija u ovaj veliki sarajevski spektakl.

Ogromnoj masi prisutnih slavljenika Olimpijskog plamena predsjednik Jugoslovenske omladine Goran Radman uputio je i ove riječi:

- „...Plamen olimpijske vatre stigao je na ognjište domaćina XIV zimskih olimpijskih igara – u Sarajevo. Njome se još od Sparte i starogrčkih sportskih natjecanja preko Kubertana do danas prenosi duh olimpizma, ljudskog dostojanstva i mladosti. Prvi put sada je i kroz ovu zemlju, od Dubrovnika do Sarajeva, prenesena ta baklja sportske borbe i nadmetanja, baklja mira, prijateljstva i razumijevanja...